

Tiada Dana Diberikan Kepada PM - 1MDB

MStar

3 Julai 2015

Oleh: SOFEA SUSAN ALBERT KASSIM

KUALA LUMPUR: 1Malaysia Development Bhd (1MDB) menegaskan bahawa syarikat pelaburan strategik kerajaan itu tidak pernah memberikan sebarang dana kepada Perdana Menteri Datuk Seri Najib Tun Abdul Razak.

Syarikat tersebut menerusi satu kenyataan media menjelaskan mengenai perkara itu bagi mengulas laporan Wall Street Journal (WSJ) pada Jumaat yang mendakwa dana hampir AS\$700 juta dimasukkan ke dalam akaun peribadi Najib.

"Merujuk kepada laporan berita yang disiarkan awal pagi Jumaat, 1MDB ingin menjelaskan bahawa syarikat tersebut tidak pernah memberikan apa-apa dana kepada Perdana Menteri.

"Tindakan menyebarkan laporan tidak tepat itu adalah satu perbuatan tidak bertanggungjawab dan satu percubaan untuk melemahkan syarikat ini," demikian menurut kenyataan tersebut.

Terdahulu, Sarawak Report mencetuskan pelbagai tuduhan tidak berasas terhadap 1MDB menerusi pendedahan maklumat yang dibocorkan oleh bekas eksekutif PetroSaudi International Ltd, Xavier Justo yang kini ditahan di Thailand.

Laporan Sarawak Report yang turut diubah itu digunakan untuk mengelirukan orang ramai mengenai isu 1MDB turut dipetik akhbar The Edge.

"Kenyataan baru-baru ini telah menimbulkan tanda tanya mengenai kebenaran beberapa dokumen 'bocor' oleh media tertentu, dan blog Sarawak Report," menurut kenyataan itu.

Menurut 1MDB, berdasarkan laporan akhbar, dokumen yang dibocorkan itu telah diubah dan digunakan Justo untuk memeras ugut bekas majikannya.

"Kami terkejut bahawa dokumen seperti ini, di mana kewujudan dan kesahihannya belum disahkan secara terbuka, terus digunakan sebagai asas untuk membuat tuduhan tidak berasas terhadap 1MDB," katanya.

Menurut 1MDB, mereka telah memberi kerjasama penuh terhadap Ketua Audit Negara, Jawatankuasa Kira-Kira Wang Negara (PAC) dan Bank Negara yang memulakan siasatan terhadap syarikat itu.

"Pihak berkuasa mempunyai semua maklumat yang berkaitan, dan IMDB meminta semua pihak menunggu hasil penemuan mereka sebelum membuat dakwaan lanjut dan penghakiman," katanya.

Hakcipta Terpelihara © 2015 Star Publications (M) Bhd (Co No 10894-D)

Source: <http://www.mstar.com.my/berita/berita-semasa/2015/07/03/tiada-dana-pm-1mdb/>